

四庫全書

集部

欽定四庫全書

集部

忠惠集卷二

詳校官庶吉士臣翁樹培
侍讀臣孫球覆勘

謄錄監生臣馮克翬
謄錄監生臣董誠

欽定四庫全書

集部四

提要

忠惠集十卷附錄一卷

別集類三 宋

臣等謹案忠惠集十卷附錄一卷宋翟汝文

撰汝文字公巽潤州丹陽人登進士第事徽

欽兩朝至顯謨閣學士出知越州高宗時歷

官參知政事以伉直忤秦檜罷歸事蹟具宋

史本傳及孫繁所作誌銘中忠惠者其歿後

門人所私謚也汝文好古淹博深通篆籀嘗從蘇軾黃庭堅曾輩游故所為文章尚有熙寧元祐遺風史稱其為中書舍人時外制典雅一時稱之蓋當北宋之季如汪藻孫覲皆以四六著名惟汝文能與之韻頑周必大序覲鴻慶集稱中多誤收汝文所作亦足見其體格之相近矣楊萬里誠齋詩話引汝文左僕射制中古我先王惟圖任舊人共政咸有

一德克左右厥辟宅師二句以為用成語雅
馴妥貼之式又引賀蔡攸除少師啟中朝廷
無出其右父子同升諸公二句以為截斷古
語補以一字而讀者不覺為巧之至今觀其
文大都根柢深重措詞雄健所謂無一字無
來處者庶幾足以當之非南宋表啟塗飾剽
掇之比其為作者所推非徒然也集乃其子
耆年所編見於宋史藝文志者三十卷明以

來久不復傳今從永樂大典各韻中掇拾排
比編為十卷以存其梗槩又汝文罷執政後
嘗提舉洞霄宮宋史失載其事近朱彝尊撰
洞霄題名記僅以李彌遜筠溪集所作制詞
為據繫之紹興二年且取靖康原職題曰顯
謨閣學士今考孫繁誌銘則汝文實在紹興
七年冬以郊恩除資政殿學士提舉洞霄宮
彝尊未見此文故所記俱誤今並以繁文附

錄於末亦足為考證之一助焉乾隆四十六

年九月恭校上

總纂官臣紀昀臣陸錫熊臣孫士毅
總校官臣陸 費 墉

欽定四庫全書

忠惠集卷一

宋 翟汝文 撰

內制

戒士大夫不為朋黨詔

朕惟先王之時在位者有羔羊素絲之節故其詩曰退食自公委蛇委蛇其謂曲折而行可蹤跡也其謂出公門入私門而無有外交也蓋知誠身以事君為忠而豈以邀夫爵祿嗚呼其何修而可以至此乎朕夕寐晨興

以稽若先王之憲以訓廸在位罔以側言亂度罔以逸
欲從已躬率是道以先士大夫庶幾士大夫咸以名節
自勵形于四方民有所視倣而還觀之久未始云獲也
朕愍然念之豈朕躬教之辟董正于爾在官者未信歟
將風俗未殄而難可遽革歟凡所為爵祿勸勉者不足
以警動人歟蓋先王所以勵世不獨以慶賞刑威為國
使人於慶賞刑威之外有所愧耻而不為夫秉忠蹈義
之士朕之所嘉也比周朋黨朕所弗臧也顧所為拂朕

之志蹈於耻辱則子大夫其無乃自棄不自好也歟書
曰以公滅私民其允懷苟盡公也民懷之矣況朕於爾
所欲顧有不察乎繼自今其祇若朕訓以既乃心爾或
不從朕言其於爾躬有罰布告在位明體朕懷

賜張孝純詔

勅孝純卿力保孤城外抗強敵率厲將士久已踰時朕
北顧軫懷無忘終食已遣李綱為宣撫使劉韞為宣撫
副使又分命解潛等為制置司同濟援師鼓行協力卿

宜聲勢相倚內外合攻乘茲銳兵往禦外侮明諭將士各奮忠誠爵賞之行朕無所愛

撫問河南制置使解潛詔

有勅金人俶擾汾晉宿師命卿撫臨式遏亂略往殄強敵底寧湖方

撫問王瓊并一行將佐軍兵等詔

有勅卿汝等暴露冠蓋跋履山川躬提偏師往定亂略特加撫問以勞旋歸

賜李綱玉束帶戰袍金帶馬甲刀劍細物銀絹
茶燭等詔

有勅卿奮揚天威躬秉武節徃殄敵衆撫寧兵師宜有
寵頒以光行役

賜新除資政殿大學士中山西路安撫使詹度
辭免恩命不允詔

勅詹度省所再上奏辭免資政殿大學士恩命事具悉
卿以縱敵越境緩其歸師引愆辭榮可謂知耻方今邊

陲不靖虔劉朔方命卿總戎於艱難非但潔已而廉謹
往服軍事肅將天威戢彊敵之分虜攬中朝之夙憤庶
幾孟明報殲之役追繼曹沫復柯之盟苟能慷慨以立
功賢於逡巡而避寵所請宜不允故茲詔示想宜知悉
秋熟卿比平安好遣書指不多及

賜給事中詹乂乞淮浙一小郡或在外宮觀不
允詔

勅詹乂省劄子奏乞除淮浙一小郡或在外宮觀差遣

一次事具悉賢者在位賴其儀刑歲計有餘宜待勲閥而卿自訟無補志欲懷歸與其辭祿而畏譏曷若受寵而思稱為朕謀國於爾有辭所請宜不允故茲詔示想宜知悉

賜吏部尚書莫儔辭免兼侍講恩命不允詔

勅莫儔省所奏辭免侍講恩命事具悉朕詢求儒學入侍燕閒講明六藝之歸允賴多聞之益爾進讀方冊援證羣書雍容可觀誦說有法朕方嚮意經術追跡古文

庶幾微言命使折衷爾其信以傳信慎所闕疑令朕聞所未聞施於有政所請宜不允故茲詔示想宜知悉

賜刑部尚書李彌大乞除便鄉小郡或外任宮觀不允詔

勅彌大省所奏欲望除便鄉一小郡或外任宮觀任便居住事具悉頃者疆敵內侵嘉爾獻策朕惟朔方重寄命爾撫師兵戎乂安疆場綏靖事既底定今其遄歸顧非寵遷何以遜避所請宜不允疾速朝見供職故茲詔

示想宜知悉夏熱卿比平安好遣書指不多及

賜御史中丞陳過庭乞宮觀不允詔

勅過庭省所上劄子奏乞除在外宮觀差遣任便居住事具悉卿頃任風憲屢貢讜辭肆朕纘承復還舊物督姦為國昔聞臧孫之立言端委在朝今見叔向之遺直而幡然求去殊異所期方今議論畢陳紀綱略定思得卿重徃修厥官所請宜不允仍止來請故茲詔示想宜知悉

賜知雄州郭仲荀辭免遂安軍承宣使仍更轉

一官回授白身恩命不允詔

勅仲荀省所奏辭免遂安軍承宣使仍更轉一官回授
白身恩命事具悉朕嘉爾扞城寵以使節增崇褒賞之
典旌勸忠義之臣辭之非難思所以稱所請宜不允故
茲詔示想宜知悉秋熱卿比平安好遣書指不多及

賜新除給事中楊時辭免恩命乞致仕不允詔

勅楊時省所奏伏望追還成命許令致仕事具悉朕起

卿燕閒任以言責卿得時遇合欲踐所聞擢從諫垣往
莅瑣闈庶幾疇昔抗章伏閣之志施於今者論事批勅
之間而以疾引年懇辭謝事朕意未可卿其少安所請
宜不允故茲詔示想宜知悉

賜新除徽猷閣直學士楊時辭免恩命不允詔
勅楊時省所奏辭免徽猷閣直學士恩命事具悉朕聞
古者崇德先者老成人之不遺士雖引年皆耄期稱道
而不亂朕從爾謝事之請嘉爾為臣之終雖皤然旅力

之既愆而綽然進退之餘裕加命以職寵榮其歸使廉
耻復興名節滋重士有矜式不亦可乎所請宜不允故
茲詔示想宜知悉

賜權管幹殿前司公事王宗漣辭免殿前都虞
候恩命不允詔

勅宗瀆省所奏辭免殿前都虞候恩命事具悉卿總齊
禁旅祇護殿巖守衛京師作固王室命茲環尹以獎爾
庸胡為懇辭不承朕意雖褒申伯之元舅欲同懿親而

戒祈父之不聰敢云虛受勉茲職事期於爾成所請宜
不允故茲詔示想宜知悉

賜武昌軍承宣使權管幹侍衛步軍司公事閻
勅乞宮觀不允詔

勅閻勅省劄子奏乞一宮觀差遣事具悉師律以順成
而為減軍事以無犯而為正朕方將帥久任欲以紀律
而服戎爾其威令必行使知少長之有序惟服朕訓無
棄爾成所請宜不允故茲詔示想宜知悉

賜新除汝州觀察使曹曠辭免恩命不允詔

勅曹曠省所奏辭免汝州觀察使恩命事具悉迺者加
命使節屬當戎行爾以世祿引嫌抗言避寵朕惟光獻
臨朝之澤烈武佐命之勲及其子孫褒爾閥閱往服新
命無為固辭所請宜不允故茲詔示想宜知悉

賜門下侍郎耿南仲辭免男延禧除太常少卿
恩命不允詔

勅南仲省劄子奏辭免男延禧除太常少卿恩命事具

悉朕蒐攬賢雋程其器能豈以天官而為私寵奉常之擢誰曰不然而卿以嫌力辭初無祁奚內舉之意朕慎用德選寧有尹氏世卿之譏所請宜不允故茲詔示想宜知悉

賜朝奉郎試兵部尚書孫傅辭免兼侍讀恩命
不允詔

省所奏辭免恩命事具悉朕復爾舊物思聞嘉言雖殫儲宮調護之勤而失露門進讀之益故使卒業便於詢

謀方求胥臣之多聞允賴寬中之篤學其悉爾蘊以廸
朕聰所請宜不允故茲詔示想宜知悉

賜參政福建宣撫使孟庾詔

卿輶從廊廟往摠戎兵先聲所臨羣醜自殞雖閩粵已
定方奏凱旋而湖湘未寧猶煩夙駕勉事道路務專精
神思見儀刑念山川之悠遠倚成籌策賴樽俎之折衝
特諭朕懷益嚴師律

賜福建宣撫副使韓世忠詔

卿率先戎行徃遏亂略慨然忠義之奮殄此狂狡之餘
究觀用心造次許國見危授命不以事至而辭難好功
與名豈待爵賞而加勸方今底平閩越士已策勲經略
湖南兵未振旅俟卿凱旋獻捷蕩定有期論次前後之
庸併加寵數之渥益堅用命其體至懷

賜新除端明殿學士江東路安撫大使李光再
辭免恩命不允詔

勅李光省所奏再辭免恩命事具悉朕觀秣陵根本之

地有表裏河山之固非我文武兼資之臣孰當公侯干
城之任乃者輟卿帷幄為國藩翰庶幾京師之蒙福將
使自葉而流根而卿乃以人言過自為計朕惟讒說殄
行能震朕師範愚服讒本誣盛德豈容小醜歷詆在廷
以卿自信不疑之心副朕委任責成之意益務體國無
復有辭所請宜不允仍疾速起發兼程前去之任故茲
詔示想宜知悉夏熟卿比平安好遣書指不多及

左中大夫同知樞密院事沈與求除知樞密院

事制

履中微之運日有冰淵之虞念大業之難凜若芒刺之
負時方右武事莫急兵乃眷樞筦之臣備宣忠力其正
機庭之位增重本朝具官某學洞古今才優經濟周旋
萬事有著龜先見之明夷險一心挺風雨不渝之操任
國柱石作朕股肱比從真館之游起參右府之寄宥夙
夜之密命翼翼秉心贊帷幄之深謀孜孜盡節方重安
危之倚式昭翊亮之忠匪進陟於鴻樞其曷副於公論

朕將祇承天命以戡定禍亂所賴制勝樽俎以輝耀威靈益修我戎企是機會儻三軍五兵之用可以懷徠彼九州四海之人何憂弗格副予至意厲爾壯猷

參知政事劉大中除資政殿學士知處州制

選用賢能建置輔弼欲以肅清內外圖濟艱危然以采之不廣則難以得人任之不久則難以責効至於畏遠權柄以疾為辭懇避寵名以事而解亦不得固留也具官某以勁挺之資守中庸之學沉幾敏識足以有為於

時同寅協恭足以不愧於昔自擢參於大政實有副於
具瞻而稱疾病者至於再三上印綬者至於數四朕惟
眷倚之重中外則均進退之宜始終以禮是以畀括蒼
之舊鎮加秘殿之隆名以便爾私以從爾請夫官盛任
使固古人所以勸大臣之道而易祿難畜亦儒者所以
為自處之常惟益究於乃心則有光於朕命

真臘國王金袁賓深明堂加恩制

門下宗祀之慶覃及萬方象胥之言通於九譯乃眷海

隅之長屢修時事之恭其敷神休用錫爾寵大同軍節
度雲州管內觀察處置等使金紫光祿大夫檢校司徒
使持節雲州諸軍事雲州刺史兼御史大夫上柱國真
臘國王食邑三千四百戶食實封一千四百戶金褒賓
深夙推誠節遠有令名載馳大賂之琛入効充庭之實
亦惟恃我朝廷爵秩假寵有邦用能保爾山川土田傳
序累世頃專將閭之任久假齋鉞之華能肩乃心不失
舊物朕躬祈宗祀敷佑羣黎消選季秋之辰具嚴三歲

之享敝九筵之重屋並侑祖宗率萬國之歡心奉承圭
幣爰因熙事之惠澤增益食賦之爰田寵爾世臣併加
命數具祇敦策戒思保寵榮於戲翕受蕃禧以丕釐上
帝之命大資率土用不遺小國之臣可特授前檢校司
徒持節雲州諸軍事雲州刺史充大同軍節度雲州管
內觀察處置等使兼御史大夫真臘國王加食邑五百
戶食實封二百戶散官勲如故主者施行

占城國王楊卜麻疊明堂加恩制

朕采汶上之儀因省方而享帝授泰元之策期斂福以
錫民歡忻既洽於羣神慶施遂周於四海載頌顯命以
建殊邦具官某氣稟純和性資忠一介南溟而有國世
蒙湛露之多濡謹北面以稱藩蠻識疾風之不作庭琛
屢貢爵典荐加建大將之高牙視三公之極位王靈滋
至侯度益恭屬展采於宗祈既成熙事顧廣恩於祭澤
可廢彝章乃增衍於爰田并倍隆於真實以侈精禋之
貺以昭順節之褒於戲崇德報功朕則靡遐遺之間嚮

風慕義爾其堅內附之誠往對寵恩永綏厚祿

闍婆國王悉里地茶蘭固野明堂加恩制

朕省方近國聿崇三歲之親祠展采合宮咸倣九筵之
往制玉帛交薦豆籩駿奔輯廣禮以消成委鴻休而來
假肆推慶施用軼絲區具官某性質溫恭天資誠順宅
海隅而有衆自矜樂國之餘嚮天闕以觀光夙起華風
之慕梯航屢至爵服載頌地雖隔於域中心每傾於日
下屬修元祀普洽湛恩惟顯相之勞賞已加於羣后念

來臣之舊澤豈間於遐方即六纛之前儀仍三槐之故
秩衍之多戶陪以真封併為裔土之光式廣穹旻之祐
於戲寵均列辟曾無内外之殊居限重溟當識朝廷之
誼往綏蕃祉以永令名

節度使開府儀同三司除尚書左僕射兼中書
侍郎制

古我先王惟圖任舊人共政咸有一德克左右厥辟宅
師格於皇天廸我高后嗟爾萬方之有衆聽予一人之

作猷具官某為國世臣若時元老有申伯柔惠之德操
此萬邦有山甫將明之忠式是百辟勲在盟府紀于太
常淑旂綏章壯十乘元戎之寄繡裳赤舄兼三事大夫
之儀疇論道經邦之遠猷對代天理物之元宰眷茲屏
翰作朕股肱遄命袞衣之歸爰趨介圭之覲賚予良弼
維簡在上帝之心建爾上公以欽若先王之烈具瞻四
海師表萬民其正左輔之名徃摠西臺之務朕欲四方
其訓無競惟人汝維庶績咸熙允釐在位命乃保乂格

於丕平使山川鬼神亦莫不寧致華夏蠻貊罔不率俾
於戲欲治已久得時為難由成湯而至文王若伊尹菜
朱之親見乃齊宣之知孟氏曾管仲晏子之不為往肩
乃心以輔台德

工部侍郎除節度制

朕若古有訓無競維人六軍之將命卿用嚴師律萬夫
之長觀政以總戎功圖惟元老之猷增重師干之寄疇
於常伯廸此外庸咨汝在廷聽予明命具官某智涵遠

略文被明章有見危授命之忠不愆於素有決勝運籌
之略惠可底行惟懋汝績克簡朕心肇自冬官之崇往

司方岳之寄貴齊壇之旄鉞具將閫之威儀受茲關錫

韓侯之赤舄虎符龍節荒外服之山川犀甲熊旂侈元

戎之威命用光於衆有煥其容四國于蕃內以承寧於

諸夏大邦維翰外以統制於殊方予欲壯形勢以重國

威汝惟揚聲名以振鄰敵腹心干城之寄公侯所以好

仇先後禦侮之臣昆夷所以致附式遏亂略以戒不虞

於戲修方伯之職以受王嘉師殿天子之邦用成爾顯
德無失朕命徃肩乃心

欽定四庫全書

忠惠集卷二

宋 翟汝文 撰

外制

王行可除開封府右司錄制

朕用中執法以肅齊紀綱協同國是實有嘉績然初不
汝知也抑有子而材觀汝所以教忠則賢矣擢汝天府
之屬重能以嫌自別益嘉其志升總羣掾祗服朕言

盛允開封府司戶曹事制

朕惟京師衆大之居有獄市并容之寄制煩治劇自昔為難故選建司牧慎用其屬爾以文無害祇服朕命欽哉

王孝開封府儀曹掾制

禮與法相須為用禮所不可者法之所禁也故伯夷用典禮以折民臯陶用刑以教祇德兩者相須如是爾為掾天府掌凡禮事苟知禮矣於聽訟折獄何有哉

王孚開封府司兵曹事制

天府建國之始朕肇正尹牧改制羣掾咸有所職無俾
擾德爾將事膚敏無易乃選聽訟折獄其傳古義欽哉

朱惕開封府兵曹係開封尹王詔特薦制

大道之行人以公舉昔祁奚能舉善於晉稱其子不為
黨韓獻子受趙孟之舉戮其僕不為過豈非公於為國
而無事於姑息者乎朕詢謀卿士之衆因詔言以知汝
惕試之天府非特以是觀汝從政亦因以是觀詔所舉
汝勉之矣

王汝明開封工曹制

汝為吏而材使者咸以為言夫能用其長發聞於世朕
固寵嘉之抑知人之難吾欲其材適於用而聲中其實
故復觀所從政使隸天府孔子曰如有所譽其有所試
汝勉之矣

李彥端陳彥修並除開封府少尹制

王畿作極四方曰衆大維京師視昔三輔實繁庶獄朕
篤近舉遠首於茲邑近拂予志其能觀政有邦爾從政

克藝徃陟亞尹惠養無告威制弗若離爾王明並受厥
福休哉

都官郎中蔡穀除開封少尹制

朕咸和四方民罔有内外矧我甸服惟爾庶邦所瞻用
慎擇尹伯立政以作民孚先敷求爾多士惟爾穀耆艾
好修徃丞於長爾惟戒哉為天牧民非爾惟曰天牧其
尚監於天顯矜慎罪罰率用彝憲則惟爾克享欽哉

戶部侍郎王草除開封尹制

朕惟王畿千里之廣雜衆民五方之俗職於內史自昔為難非有豪傑兼人之資孰當衆大尹正之任具官某政事通明智識闊達必能以發姦擿伏為治以保民馭吏為本豪強誅鉏則小民得職惡者勿殖則善者伸矣爾嘗試於斯未究其用徃服乃事以繼前烈

朝請大夫閻騤除應天少尹制

朕班授政常肇初惟名實惟公師暨臣僕咸改釐位置矧天府作極四方用正爾尹牧羣掾對越於古粵陪都

用協厥邑汝以政事贊乃長其易名於今茲

兵部侍郎陳彥文除顯謨閣待制河南尹制

成周肇初於洛邑乃求地中惟卜宅肆我祖宗造邦以為西郊宮室宗廟罔不咸在咨擇近列俾作尹於茲邑具官某延登貳卿祇若予采予欲審觀政事俾爾施績於民出試近服爰畀管鑰徃居留於成周舊邦其尚固封守無媿前烈

黃靜廣東路常平盧知原利州路常平制

先帝為力本任農之法而尤詳於荒政豐則委積水旱
則施舍所以權節民用而為取與其法完矣然視歲之
上下察民之緩急非才識之士通達法令審於奉承則
吾不以付之爾等咸以選用祗服此言

湖南常平王本除京畿路提舉常平鄧益京西
路提舉常平制

朕推哀矜恤隱之德畀於將命喻指之臣使推斯意以
致斯事夫能體朕德意鮮矣昔成王之告康叔未有若

汝封之心朕心朕德惟乃知以成王咨嗟勤懇如是夫能喻上所欲推以置人腹心難矣哉爾等咸朕識擢無忘訓飭

又朝請郎黃靜福建常平制

汝出於閩粵俾汝將事徒以汝能識民情偽知吏寬猛夫以王命督察郡國固已榮矣而况懷綬以歸郡邸持節以見關吏豈非昔人所賢而於汝謂寵乎

應安道除淮東路常平制

朕建勑農之官修水土之政為復除以惠鯀寡均地賦
以寬民力有不順成荒政畢舉靡所遺矣汝以才選奉
若成憲則為稱職

武功大夫宋滋提舉京畿路保甲兼提刑制

三代兵刑為一所謂大刑兵也今汝以武列用夫能教
民技藝拳勇汝之所易而用律察於微文汝之所難也
然吏道以法令為師輕重有典而師衆以順為武必其
少長有禮而後兵可用也其責不亦難乎汝慎其所易

而深憂其所難則寡過矣

賈君文河北路提刑兼保甲制

朕繕修武備而寓兵於農矜慎庶獄而求生於律夫民勇而知方則易使獄以情察則民服兵與刑國之大事也汝以武選奉將使指習於舊治則易為政治兵欲嚴恤刑欲寬嚴失於急寬失於縱能審而用則罔所愆可

宋滋賈君文康厚种師中王環滿志行並提點

刑獄兼保甲制

國之兵刑大事所在朕惟無有驟用其民不教而戰又
惟無有誤於庶獄不韋於戮故講事於蒐狩教民知義
哀矜於刑罰以良折獄其孰能奉將使指俾予從欲以
治者乎汝以武選祇服朕訓惟慎與畏庶幾有濟

兩浙路提刑周邦式江東路提刑李公年兩易
制

江左之地瘠其民力耕而望歲吳越之地富庶其民趨
末而彌侈夫禮義生於富足疑若易治然瘠土之民勞

則好義其富有不如貧之絳也唯視其俗之緩急以為賦政之寬猛於是乎嚴而不疵寬而不流汝等既將命矣易地而往勉服此言

葉默等江東淮南運副制

惟古王人存省諸侯粵行人撣人暨訓方氏形方氏典乃職王又時巡觀侯度詔賞罰朕惟今邦國若否耳目是寄實惟爾膚使汝等舊惟成人往指告於四方寬詔地恫瘝罰刑俾遠不戚於朕教時乃休

荆湖北路提刑徐宅除荆湖南路運副制

昔孔子稱季路果於從政可使治賦於千乘之國夫千乘諸侯之封也顧子路兼人者能之今刺史總郡國如古者十數而責成於一人之任豈不難哉然能使雖衆如寡雖遠如近惟才者然後優為也汝使於四方以善最聞其服新命往底成績

王璣除京西運使制

惟茲官師百執委任責成既久乃孚咸即爾工矧歷試

惟舊有勞於厥邦用嘉厥休無斁爾宣力四方正事克明乃良於行丕應朕志茲予商賚爾功懋正顯秩維民綏於舊訓維政事習於舊俗上下胥信時則罔艱其爾慎恆厥終往承於故武

直龍圖閣梓州路運副趙適除集賢殿修撰本
路運使制

昔先王勉勵在服制為德賞無敢以其作好輕用唯是車服之寵曰天命有德將實代天鑒觀而與之可輕乎

哉朕躬率是道以視羣臣汝將事於蜀顯有丕績秘殿之職華國之選朕非以是私汝亦非以是徒寵汝為也其思所以畀汝者

陳覺民起復陝西運使制

汝執親之喪篤於守禮朕惟忠臣殉國之義有釋哀奪情之典起汝哀疚付之漕事夫禮有適變而從宜權有反經而合道汝學於古則嘗聞之矣祇服朕命以顯乃親

江東路轉運副使姚蕡荆湖北路轉運副使孫
漸兩易制

古者荊州之域其川九江其賦上下其在春秋楚之建
國也後世始分江湖以殊統制今爾漸以嫌自列朕惟
忠臣事君無有擇地而處又以禮必均勞逸不求於他
使與孳易皆禹服荊州之地職貢既同厥壤惟舊所以
為爾等自謀深矣其祗悉朕意務安爾職

淮南路轉運副使宋康年淮南江浙荆湖制置

發運副使制

惟東南貢賦漕舟自淮泗歲不時入用蠹厥載朕俾厥
貢自庶邦徑底於中畿餉溢予廩時乃食新爾以推擇
承命奉若成憲朕方盍徹以裕民乃其取羸為羨餘朕
弗臧乃事時則有愆惟爾廸知畏義其往省哉

直祕閣陝西路運使陳遘除直龍圖閣知慶州
直龍圖閣知慶州侯臨知延安府制

朕責成閫外之政委以方面之重欲其因事施宜以權

制敵古者大夫出疆有可以專境外之義而使者受命辭之禮苟皆從中孰與任事爾等久莅疆場習知邊務其亦鑒前政之失而知朕意所以付爾者矣必能伐交與謀善用籌策往悉爾心期於有成

徽猷閣待制龐恭孫知成都府制

春秋王者無外以四裔為守治世為國不師以公侯干城蠹爾戎羌藉其疆境使為外守以扞固吾圉必有干城而制其腹心載稽顯庸可無異數具官某歷試於外

實勞厥初往城蠻方以宣王畧不有禦侮孰威不庭豈
惟暴露經營之勤實賴撫綏安集之力錫爾延閭殿於
坤維尚繄壯猷以靖疆場

程鄰知荊南府制

朕偃兵息民不勤遠畧蠢茲蠻封請吏於我率是羣醜
以式王命為擇賢帥綏靖其民肆余命爾往固封守夫
地連巴蜀叛服不常不可覲武無使怙亂申命爾往唯
安輯之不求勝也彼擾於服習將率舊德其肯自棄於

惡而必為釁乎

顯謨閣待制知蘇州盛章知真定府制

朕惟內外股肱之郡委重二三師帥之臣苟非更變不
疑謀慮有素則必臨事而懼安所倚成具官某擢置侍
從顯有風烈疇咨夙望之已著庶幾遠人之信服畀爾
方面為朕藩屏夫文武異用兵民異政以文綏靖以武
威制非此二者將焉取斯

顯謨閣直學士梁子野知河陽府制

朕於侍從之臣必試以牧民審觀治行將使知朝廷詔
令之意習四方宣力之事蓋不學操縵不能調瑟未能
製錦必將敗材故歷試政事考其功實將有為也具官
某蚤繇閼闈踐更邇服盟津之壤為股肱郡朕既處汝
以近民亦將因民以觀汝其以法令為師則能寡過

知單州宋昇可徵猷閣待制知應天府制

商丘后帝以封閼伯武王以為商人是因始起微子肆
我祖宗造邦王業之始蓋與全魏洛師均倚為重朕豈

輕其人哉具官某發閒於少才識膚敏爰試政事委以
留鑰維父維子隱然相望並踐邇列更歷藩服豈非朝
廷之盛而搢紳之寵乎益務靖共無忘忠孝

直秘閣京西運使王璣除集賢殿修撰知平江

府制

昔先王處民瘠土惟民勞乃好義固有佚欲肆於東南
浮於震澤惟吳會厥壤豐殖厥賦倍蓰民從驕奢狃於
舊俗朕咨度外庸賦政以已俾咸有革心爾服我王事

悅有顯績用分土南服其胥訓小民式從爾政治無康
好舊習惟良顯哉

集賢殿修撰知鄆州吳拭復龍圖閣待制知河

南府制

若古元侯屏衛中國為時友邦以克厥庸用能四方以
無競底於丕平朕惟二三屏翰殿我王室匪我舊人孰
堪往釐具官某政事顯聞有勞於歷試昔踐邇列其能
體予德意用康小民界爾舊物肆命爾往撫乃封其綏

靖疆土以倡庶尹俾我周邦咸喜欽哉

資政殿大學士中太一宮使兼侍讀鄧洵武除

河南府兼西京留守制

維昔三川之舊邦自周九鼎之卜宅圖書所出之地風雨所交之畿而况列聖陵寢之所在原廟衣冠之所游非我舊人孰分憂顧具官某器博而用遠實茂而聲宏覲自洛師勉留祠館數祈均逸於外服每秉勞謙之小心朕惟大臣中外之迭居嘉賢者進退之以禮時乃舊

治式圖爾居予欲宣力於四方用觀賦政爾惟乃心在
王室其尚告猷

新除集賢殿修撰知江寧府呂拭可改知鄆州
制

朕申命邦甸侯衛咸勤策戒審厥民俗土風使賦政事
罔有蓋政於民惟汝陽夸奢自昔利口未殄矧承粃政
荐荒於厥初爾典治內史光昭前聞率乃尹正於舊為
朕保釐近服肇自東原達於表海俾咸爾蒙賴惟爾有

休其能撫余嘉師

發運副使集賢殿修撰董正封知蘇州制

吳俗之敝其民輕揚而奢侈機巧而趨利自昔則然維有德君子鎮之以重厚濟之以簡素則民靡然心服不令而化爾以長者稱宣力四方昔董漕事既悉其俗矣祇朕訓告期爾政成

直祕閣權發遣荆南府程鄰特授集賢殿修撰

知桂州制

汝昔治桂林經制南服紀律著於士衆威信伸於殊俗
夫戎已畏則易懷兵已習則易使其改節制往釐舊治
惟善於始者則能有終其體朝廷柔遠之義益勵將帥
禦侮之畧

刑部員外郎孫義叟除直秘閣知夔州制

朕底綏九服弗勤遠略蠢茲諸蠻式我王命咨爾舊治
往咸乃衆若古士制五刑典茲遠人之弗率朕惟戎兵
曰大刑其施惟一爾昔佐士師唯明克允允職東觀光

於申命其尚訓兵講武綏靖疆場

朝請大夫韓持知衛州制

昔之君子有不忍刑罰為治其民靡然愛慕有不忍欺其長者豈非有德而後能行之以寬乎衛雖褊小其民重厚朕思得老成人臨以豈弟莫如汝宜昔詩人稱衛武公之德曰寬兮綽兮善戇謙兮謂其文而有禮以寬得民也汝實其言豈惟民是賴朕實嘉汝

蔡居厚知齊州制

齊古之建國其民漸於洙泗好禮而畏義尚賢而貴老
可以德服不可以力勝可以靜治不可以衆擾昔之為
齊者以平易近民而民歸之以清淨為貴而民自定汝
以循吏有聞愷悌多愛其師治道於相國而追太公之
遺俗則於汝政成不勞而治

張邦昌知光州制

有民人社稷之重足以為政有庠序禮樂之教足以為
學君子學道則愛人亦可以行其所聞矣汝言語政事

見於已試光雖小邦民俗寬厚請問故老延見諸生因其禮俗臨以愷悌則予汝嘉

顯謨閣待制知鄭州呂益柔除知越州制

三代要服處會稽揚州之域不及以政然昔有夏方懋肆觀羣臣於會稽地雖險遠亦后省方觀民所底朕敷求愷悌之士惠綏遠人殿於大邦作固南服具官某寬厚有容安靜不擾往喻條教究宣德澤無曰鄙遠如在近甸惟民阜安乃稱朕意

顯謨閣待制知明州李圖南除知越州制

朕惟風俗之敝重內輕外師帥近民咸不屑為政去國益遠則輕棄其民故尊寵侍從之臣出為屏翰之寄以倡庶邦示不忘遠具官某質厚無華木訥有常易汝近邦徃臨越俗因其故習臨以簡易使遠民識侍從之體國而知朝廷之德意則予汝嘉

石公弼知襄州制

朕加惠四方監求民瘼夫能為朕推廣德意惠康小民

非爾庶邦之司牧歟惟左右侍從之臣知朝廷法令之本則賦政於外剛柔適中縱舍有度具官某試於淮海既習為郡爾亦知夫去其敗羣如牧羊者乎以爾維揚之政施於江漢之國勉師吏道無忽吾訓

給事中劉安上除徽猷閣待制知壽州制

朕垂意四方恤隱鰥寡用勤施於遠民咸使得職惟厥左右近臣審喻朕志其能底綏有衆具官某率履自躬克有常德昔爾代言昭播告於庶邦匪難自口施乃政

事矧茲近服若予邦甸惟爾心祗辟罔有內外其尚豈弟擾民永綏厥衆

端明殿學士知熙州林據除知永興軍制

朕聞有室大競內必有折衝樽俎之臣四方于宣出則為干城腹心之寄非爾舊弼孰寧我家具官某博厚而高明沉潛而剛克出疆報聘不降色辭輔政竭誠協贊惟幄朕惟咸秦西夏之屏有疆場外域之虞倚綏信臣崇簡夙望庶幾兼資於文武以厭未形將使畏服其威

名式遏亂略增隆秘殿之職載易河湟之封緊爾外庸
紓予西顧

端明殿學士正奉大夫新知永興軍林濬知應

天府制

昔詩人嘉孝友之士相戒以養春秋褒臣有母遺施及
其君矧我帷幄之舊方懷喜懼之極苟以誠懇可無從
乎具官某秉弘毅之節蹈匪躬之故思得卿重撫臨西
秦而指赤心方寸之地披昔人將父之請辭意迫切覽

之惻然我圖爾私莫如便鎮其改節制往釐睢陽夫為人子能孝其父豈為人臣而不能忠其君哉

徽猷閣待制知應天府宋昇除知汝州顯謨閣學士席旦知永興軍制

朕歷選侍從股肱之良出為方國屏翰之寄中外踐更出處迭居固未嘗有三年淹也其倚重均一亦何常之有具官宋昇議論通明資識強敏易地臨汝徒以爾昔為宛丘密邇疆境習其禮俗無秕政事必能以平易近

民使鰥寡得職具官席旦樂於愷悌文以禮樂乃者治蜀威信顯聞其以蜀政易制西夏無改乃舊撫臨兵師夫為人臣宣力孰匪事君能為朕使遠人綏安則為報國

端明殿學士徐處仁知潁昌府制

唐虞分岳牧於內外實政事疇咨之臣肆於成周出納王命其在內服曰卿士乃承寧諸侯以操庶邦在外曰方伯茲予有近臣出入中外懋顯休績民克宜之具官

某宏毅有守直方不疚協陪國論造辟納於嘉言朕應爾顯德起爾燕休俾爾作固翰垣以憲方國矧昆吾舊宅之壤密邇邦甸惟乃心靡不嚮帝室其尚入告爾猷無替疇昔

徽猷閣待制張果除真定府路安撫使兼知成
德軍制

河朔天下之根本昔者禹於冀州獨重其賦而常山兵賦之重為河朔根本之固維此真定密邇獯鬻謀用儒

帥折衝未形具官某使於四方宣力惟舊忠以上事義
不辭難方朝廷柔以大盟而疆場安於無事繄爾更歷
往予綏靖治兵牧民文武並用其訖爾庸以寬予顧

王環河北路沿邊安撫副使劉宗道京畿路提

刑兼保甲制

訓兵於畿甸備邊於河朔授以使指傳之戎政皆武列
之選也汝自外而入其責益專審慎刑辟肅齊師旅祇
服朕訓以底成績

徽猷閣待制知永興軍何述除涇原路經略安

撫使知渭州制

四方無虞兵寢不試則疆場之臣參用儒者使備患於無事而厭難於未形顧非邇臣孰堪倚重具官某以儒術進用以吏事通顯撫臨西秦具著威信易爾節制徃釐平涼夫上兵伐謀無所事戰軍事有禮無易紀律朕方懷柔四國不勤遠略爾其謹修兵戎有備無患

殿前都虞候懷州防禦使姚古特授湟州觀察

使侍衛親軍步軍副都指揮使環慶路經略安
撫使知慶州制

用公侯以制腹心足為予武執干戈以衛社稷無易老
臣具官某沉靖有謀忠勇不疚習知遠方之事積有扞
敵之庸俾靖羌戎徃固疆圉朕方責成宿將戒以戢兵
汝其威重顯名震於逋寇

龍神衛四廂都指揮使開州防禦使劉仲武知
熙州兼熙河蘭湟路經略安撫使制

朕惟羌戎叛服之弗常思將帥委任之宜擇必有豫備
以戒不虞伐敵以謀雖本廟勝之策隸兵以武式倚方
面之臣具官某沉靖有謀忠勇不疚習知遠方之事積
有扞敵之庸申命河湟攝固疆圉朕方責成宿將戒以
息兵汝其威重顯名震於逋寇

种師中湟州觀察使侍衛親軍馬軍都指揮使
制

用公侯以制腹心雖本廟略執干戈以衛社稷維爾將

臣式圖勲勞肆用褒顯具官某積有世閥著聞邊陲顧
弗諫之蠻方窺新造之城壁繫爾士衆破走豺虎之羣
俾我天威速如雷電之至師旅益振羣醜既俘朕惟戰
功曰多賞不踰月制詔大吏趣論乃勲寵升庶車畀乃
舊服庶幾忠力之必報以示朝廷之不忘虎臣獻功古
有在泮之禮太師論賞職在盟府之藏其訖爾庸尚資
禦侮

判登聞檢院王仲端除軍器少監制

昔我先王儲戎器用威不若惟時罔俾衆覩用橐弓戢
戈藏於王府曰惟佳兵朕敷文德底乂制戎器曰毋忘
備禦惟爾愷悌篤誠圖忱於德若昔垂共工弓戈竹矢
肆後王典寶粵崇鼎離磬惟均令命爾若予工往蠲乃
事惟明時述欽哉

劉伯容閭門宣贊舍人制

漢以謁者治禮以執法者舉不如儀今兼其任重矣朕
惟四方觀禮於中國贊謁大庭詔見九賓使覩國容非

嫋辭令其孰為之汝務篤謹思所以稱

汝州防禦使知客省事錢愕除樞密都承旨中

亮大夫趙希古知客省事左武郎朱孝莊簽書

東上閭門制

朕惟成周侍御之臣粵虎賁小尹暨於攜僕罔不秉德
祗畏承弼厥辟夙夜無敢戲怠朕用昭德塞違以厥庶
尹達御事用追迹於文武以爾具官某將事歷年罔有
逸德朕嘉乃庸無斁乃事其陟前列往踐乃職曰愕爾

承朕命曰希古爾典屬國曰孝莊其以爾益上閣咸聽
朕恐無棄爾成嗚呼戒哉弗慎厥初其艱有終

開封尹王詔除龍圖閣直學士提舉醴泉觀制
古者優禮者艾大夫致其職事於君而猶有不得謝者
所以示朝廷尊賢而尚齒也具官某名臣之後尚有典
刑歷年之久更練衆職乃者典治內史以惠愛聞雖精
明不衰而旅力則愆方當憫勞官職之事佚其筋力之
禮而久於繁劇非朕所安其直延閣徃益祠館上以稱

朕貴老之意下以慰爾成勞之久可

監登聞檢院鄭脩年除直祕閣提點醴泉觀制
國之宗臣佐佑帝室天厚之報必世其德嘉爾好修洵
美有儀非特以見文獻之自亦因以知君子之澤處爾
天祿間蒞祠館譬之養材封殖以待用並事君親豈不
俱榮哉

謝彥除直祕閣提點醴泉觀制

朕收俊傑以待用養耆老以厚風俗爾黃髮之良服勞

於外還職爾舊益崇爵列夫老者不貴其力而稱其德
賢者不求於日用而有餘於歲計處爾以東觀之職所
以示尚德齒於朝也欽哉

辟廬博士湯孝本除直祕閣提點洪州玉隆觀
制

爾昔嘉遜光於師言朕命邦伯勸駕乃造於朝置諸師
儒使士咸有矜式弗渝初志復辭厥位惟去就始終秉
德不疵實能篤厚風俗律我有民其錫祉福寵爾東觀

之職式用榮歸欽哉

茂州團練使崔仲安落致仕提舉西京崇福宮

制

士之致為臣者篤老而疾引年釋位禮也今爾稱道之
言不亂而筋力之禮猶壯朕安可聽其歸哉然重奪爾
志閑勞以事故處以祠館使從家食上以稱朕養老之
意下以崇爾廉退之行忠於事君何適非報

光祿寺丞陳克致仕制

汝以疾自引致官為臣之義有去就終始之節朕惟壯而委質老而謝事可不有加秩以榮其歸哉祗服新命益隆德齒

大中大夫提舉亳州明道宮劉奉世除端明殿學士致仕制

委質事君匪艱於初惟進退卒用不疵其艱在終我其灼知為臣之不易保厥躬惟明哲具官某惟時耆艾嚮用壽考乃晦明生疚固辭厥位朕嘉爾舊人休爾有辭

於逸惟爾應受顯福多有歷年增錫命秩粵榮初終其
尚若古里居惟爾尹人祇辟

翰林學士知制誥張閣守翰林學士知制誥致
仕制

仕而委質於君疾病則致為臣而去禮也朕於通籍之
臣皆有以寵榮其歸而况左右侍從之臣哉具官某延
登近列實有昭德乃以病悴自歸印綬為聽其去以耆
爾祉爾其務寧精神冀疾有瘳如古之賢大夫享賜金

以娛父老傳安車以遺子孫豈不為終始之榮哉

鄭僅可通議大夫致仕制

爵人四方胥訓凡厥重輕於我極朕用祇嚴老成人顯
乃爵齒矧引年釋位我其敢用煩爾以政具官某實有
嘉德克媚上下去就不渝無留於祿惟周人忠厚成俗
曰養老作民恭先肆耆爾祉風於後以勸惟朕眷爾始
終其爾亦克有終

朝奉郎王實特落致仕制

士強父乃服官政爾謀乃逸棄日於未艾矧我先正之後惟爾載德不忝其服政事勉蹈故武光昭前聞



欽定四庫全書

集部

忠惠集卷

四三

詳校官庶吉士臣翁樹培

侍讀臣孫球覆勘

謄錄貢生臣黃琮

謄錄監生臣沈霽

欽定四庫全書

忠惠集卷三

宋 翟汝文 撰

外制

李彌太韓敦信王彥成並除官職制

朕惟人材不可常得也得之難則愛之至將使任重道遠不敢以驟試而輕用復置之育材之地待之歲月之久朕意亦可見矣爾等以學藝顯聞疏越之瑟瑚璉之器清廟之華也優游吾東觀以益崇譽望

朱晉太學正制

古之有好修者使人望其容貌而化服其德至耻言細人之事而鄙吝之意不存彼鄉黨自好者猶然况有爵列於朝而居師儒之任率俊造已成之士豈難哉汝教人以正當必於是

李璆除國子博士制

朕建師儒崇澤宮羣學士大夫講明道術豈其好慕古昔樂無用之空言哉將使學而後從政為我奉璋譽髦

之衆如古淑問獻馘之士與凡出師受成之禮於是乎
在夫講之不明爾之責也

李邁國子博士制

以善服人不若善養而人服以法為治不若擇人而為
法朕建學校以賓賢能崇師儒以廣道術使禮義出於
多士而國人有所矜式意在是矣爾等所職不同以經
術用其於達才成德皆君子所以教也

追官勦停人國子博士沈扶國子博士制

敕某士之可用者朕不以一眚而忘之也又况於以才任使而特以薦士為累哉爾行義知能有聞於衆久於使事績效可稱任非其人以坐廢斥宗祀之慶覃及萬方甄序厥官往惟祗服可

柴餘慶國子博士制

敕某爾於為吏才敏見稱會課有司當得遷位博士之選往其勉哉可

辟龐正張綽再任制

朕追古淳烈以建郊學正雅樂以造士擇德藝者為師
儒端委詔之使閑於干戈羽籥弦誦習吹之容而闢雎
之亂盈耳於以助朕長育人材不亦重乎爾職於是欽
哉

宣德郎王量李熙靖辟靡學錄制

師儒之官未有位著於朝也然推所聞以訓迪多士率
以行而人皆法式君子之學至於言行皆為人師而推
以惠後之學者不亦重乎汝知任之重而思稱其職勉

之哉

承務郎李璆中上舍賜第除辟廕錄制

汝食舊德有列於朝能策名學校以藝自奮其可與衆
齒乎申固命秩以為汝寵

文林郎李侗除國子正制

汝由俊造選往蒞師席夫教者使人取法於已若用法
率人末矣其以道藝使人有所矜式毋俾曰夫子未出
於正也欽哉

馮躬厚太常博士制

太常典朕三禮而博士漢掌故之職也朝廷有大制度
諸儒有大議論咸折衷之其制定秩雖卑其任重矣汝
強學不倦珍重有守其還復舊職朕方新典禮以定民
志汝其參古今以時損益

太史局冬官正姚舜輔除算學博士告詞

敕歷數之設推天地之紀協九疇之叙汝備疇人之職
王官之守也往隸上庠推所有餘以貽後學

朱肱醫學博士宋道方醫學錄制

醫之來遠矣其言布在方冊朕患道術之不明擇師承以幸學者以爾傳道授業爾亦知戒夫傳不習乎

將仕郎潘明仲除武學博士制

文武相須為用儒者兼資而有也然兵者貴謀而賤戰文以止戈為武汝講誦師言訓導學者其可不知言哉

太學正孫元卿除舞學博士制

敕具官某古者干籥皆學於東序而狸首騶虞又皆樂

師所以教國子也爾以文行簡在東膠譽處盛矣推所
講明施其右學將見諸生不但習孫吳而已則朕之所
以用汝也可

石思除司農簿制

養才待用有備無患肆敷求於暇豫罔不濟嘉我良士
簡服乃職允迪於茲朕不汝遺

孫傳試中宏詞除正字制

朕博求天下之俊髦程其器能唯恐失之詔有司悉舉

藝文以爾充賦朕既得爾於語言復欲見之行事試之冊府以觀踐履夫言之不可以已也唯君子然後能文質相稱而華實不渝爾往欽哉

王師仗等除丞寺制

昔先王使人官修其方勤思慮以名一職一日失守則為姦命用能在位者帥其訓典至於子孫以世守之朕勉勵庶工使朝夕克儉位著無忘職業爾等待用於時咸以才奮祇服訓告朕所責成

國子博士尚佐均除祕書郎制

周人置史氏以藏上世遺書與四方之志下逮邦國咸有司籍朕大建冊府集錄書契以來選承學之士隸職其間將昭文物以華國也汝美秀而文善識故實賜對誦說簡於朕心其處汝東觀之任益使博見洽聞以茂器業

杜克庫部員外郎尚瑜水部員外郎制

古之為禮者珪璋特達而琮璧有藉器非不同所用異

禮朕於人材或以語言或以政事職業雖殊處於適用之實則均也爾等討論法令通達治體進於大廷益信爾能六卿之屬事有繁簡顧非儒術不在此選行爾所職以究事君

國子博士李皓祠部員外郎太學錄張汝霖工部員外郎制

昔周王左右奉璋皆得髦士魯侯獻囚與戩亦實在泮然則學校固養才待用之所從出也朕敷求雋良悉繇

此選汝等久於學宮辨論經術必習夫齋明祭祀所以事鬼神亦與深知夫舟車器械宮室之所為矣命皓往佐宗伯汝霖冬官之屬其尚觀汝所學

傅墨卿主客員外郎制

朕養才以待用類能而器使觀其人而後賦其職業今爾好學有聞試之吏事朕惟言語政事之殊陞爾郎選處以賓客之任庶幾職清而務簡若爾者可使專對而與賓客言也往服新命益究所能

降授從事郎國朝會要檢閱文字陳邦光特授
宣義郎除都官員外郎制

汝以學行有聞達於朕聰猶不敢以譽進復觀汝於賜
對語言之間名實既信用之不疑夫言及之而不言謂
之隱言不及之而言謂之躁顧於觀人豈有異術哉六
卿之屬須以待用勉務自竭以赴事功

畢仲愈除都官員外郎制

朕欽承后帝顧享惟率籲俊髦用尊於帝凡我有命畀

爾衆莫匪簡在帝心曰黜棄亦惟后帝不蠲用忱鑒於茲惟德嘉爾猷好修克有令問往佐治典究觀爾績告爾滋克勤朕言艱哉天命可畏其無斁於爾躬

馮熙載除右司員外郎制

朕董正六官之職總治萬幾之機澄本源以清流弊振綱維以舉衆目贊治凡要委於都司崇簡其人將與為治非小試之也以爾學古好修言以自文已試而用人則信服必能知朕所以命爾者益究乃事同寅協恭

姚宗彥除右司員外郎制

政事之地委於二三臣者必有為屬以稟承庶事肅齊
紀律汝以才術預在此選唯執要以治詳唯端本以齊
末則於事不煩而為力者寡往欽哉

蘇棫考功員外郎制

朕惟知人堯舜所難雖岳牧咸薦然猶歷試而後信之
不以毀譽而廢其責實朕陟降在廷均率是道課吏之
法綱目咸具功用伐以詔爵賞今汝廉直不撓故命

此職唯明與哲乃能宿業

葛次仲度支員外郎程固膳部員外郎制

朕於六卿之屬有所考擇而無所輕重皆學士大夫之選也以經術進欲其明習憲度以德厚進欲其率勵風俗朕於是博觀而詳試之庶幾得人之盛爾等咸以後良故在此選雖出納膳羞皆有常法然知所以命爾為難也其往踐乃職副朕為官擇人之意

司門員外郎鄭昂駕部員外郎徐収兩易制

朕不難於與人以爵位而難於使人以器隨其器而適用所以為材也汝等為事之故各易其所均此二者無易汝宜思其艱哉益勤汝守

李膺除職方員外郎制

昔者聖人知人各有能不違所長而暴其短以益公綽優於為趙魏老而楚由於不能城麋之事故其使人也器之今汝以漕事對雍容儒術察其篤行非撥煩者職方氏掌輿地之圖籍於事至簡委蛇退食以崇雅望不

汝勞也

蔡竑除戶部員外郎制

朕於人材不自為進退惟歷試以事而觀其始終見賢而後用汝更踐臺閣既有聞矣朕豈以名譽而先功實哉爰試政事使典財賦夫智不能權輕重仁不能當取與不以為也無失朕命益觀汝能

禮部員外郎黃齊除吏部員外郎職方員外郎
傅宜夫禮部員外郎制

人材重輕繫於國人之論議而朝廷用舍亦為風俗之
隆替昔風人美德位之宜見於車服而切譏其光華無
實者以明不稱汝等在列嘗有所試矣朕酌於民言察
於譽望咸曰允哉增重命秩以為汝寵

知大宗正丞王規可司封員外郎制

朕欲在位皆有羔羊素絲之節如古之事君其委蛇曲
折行可蹤跡也將何術致之哉惟得修飭之士表異在
廷為庶幾焉察汝所守端靖不回試之中臺以成朕志

夫三代之所以直道而行汝嘗學之矣

李邦彥吏部員外郎制

古之掌選者銓叙九流而以人物為已任進退能否而失職者無間言夫能上下相信不疑非以其人故歟汝昔為選首久莅東觀察其所養豈弟不回太宰之屬將以是觀汝必能於法律之外有所甄別如古之君子所以為政者

蔡穀都官郎中制

汝贊治天府有能政事朕猶欲觀汝於常平之政然材料可用無適不宜與其出試治民使典一路不若歸治根本以及四方朕豈以其重易所輕哉其陞司寇之近屬無替疇昔之治行

監察御史徐禋太學博士江固聶醇並郎官制人材衆多無所作成則士苟以守繩墨循致爵位非使人趨赴不倦之意也朕躬御便朝蒐四方疎遠之士得於進對不次而用將以疎動在位者汝等因能而任皆

朕選擇非有左右稱揚之素也其務稱斯舉無忝所知
秘書丞翁彥深除禮部郎官制

朕承命古帝制器考禮粵尊彝犧象改作匹休三王乃
祠后土肇位方澤接於古帝迄用享神人交驩以妥汝
我司籍克守典禮惟昔魯史易象春秋俾周禮不斁是
賴汝繇外史即命於茲其能懋於瑚簋

倉部員外郎范之才除戶部郎官制

朕經制裕民維時摘山暨煮海觀乃長利庶倉沃衍國

用克溢審汝惟材將命方國肆其歸哉修復舊職益究
汝止往底於成

尚書考功員外郎蘇棫辟廡司業制

漆書藏於屋壁而學校廢缺瞽師入於河海而禮樂殘
壞朕追復三代之烈為辟廡禮樂以造士而擇道藝者
以為師長其選不亦重乎汝昔嘗為儒官多士信服益
舉爾職養才取士為朕得人則爾職舉矣

承議郎虞奕除監察御史制

朕咸庶工率時朕志維時安或怠於成乃不克祗畏於
簡書肆求篤實之士付爾紀綱凡厥政有弗若於訓臣
弗協於極爾乃盡言入告無畏強禦無縱詭隨祇肅在
廷欽哉

毛友方劭除監察御史制

朕大明賞罰具訓於有位欲羣工祇迪法令既黜其文
具而不以實者矣中執法之屬所以為朕督制庶尤者
也爾等文學論議推於薦紳其往新命謹視官邪無縱

詭隨朕將觀爾於是

路允迪除監察御史制

朕責成在位總正名實獨賴耳目之官以時督察舉其勤惰能否以詔賞罰廢置持國綱維助成政理不已重乎爾繇學校進朕所識拔必能體國為意其悉爾心勿枉勿撓興於朕躬無有所隱

陸德先監察御史制

朝廷乂安人有法守則吏或狃於故常習安翫治弊實

生之惟爾執法者以時為朕督察夫曠官失職不待舉而見惟夫文具而實不應察之所難也汝以名節自嘉往踐所聞欽哉

吏部員外郎黃齊校書郎李彌大華實蔡竑並除監察御史制

人君冕向前旒崇設外屏所以收斂聰明而不自用故以執憲為耳目之臣夫一人之身腹心焦勞於內而視聽不審可乎朕中夜以思唯恐吏治不良四方之民有

失職不辜子大夫學於上古通於世務其為朕察治衆職程奏顯言切磋究之無忽

尚書右司員外郎馮熙載除起居郎陳邦光起居舍人制

朕惟堯言布於天下文武之政布在方冊夫唐堯文武之世尚矣豈非當世史氏得其所託然歟朕躬御治朝日慎萬幾凡君臣相與吁俞議論與夫國之大政事典禮咸書之簡策委於爾近侍之臣夫言而不文則不足

行遠事而不實則不足傳信爾等富於問學其為朕書法不隱以詔天下後世豈非國之良史乎

朝奉大夫樓异除直秘閣制

朕博集天下之遺文以建冊府益選多士之俊傑以廣育才雖不以殿最責之吏事然崇以譽望就成德器亦難其人矣夫選之嚴則任之重而以得為榮汝以雋良既果而藝故寵汝東觀之職增重師帥之選休哉

吳接直秘閣制

朕惟二三舊臣預聞熙豐政事以暨輔朕於初載體貌之不忘今元老久於事樞獨以病告引年去位朕寵以帥鉞畀之青社使撫臨故里又重錫汝以東觀之職所以榮其歸而慰吾舊弼也汝得之非艱無忝乃父

九域志編修官翁彥深除秘書丞制

詩書去世古遠錯亂弗完然有志之士至收漆書脫簡於魯壁汲冢之餘其所存微矣朕建冊府裒三代之遺文齊諧所記稗官所錄靡不畢集使學者益觀所未見

以廣育材不亦華乎命爾典籍無忘所職

集賢殿修撰蔣猷除中書舍人制

若昔內史詔王生殺廢置凡厥有成命載於策書佐貳
冢宰茲惟重哉朕敷求俊良追復前烈具官某踐修有
聞篤厚以和簡畀在廷修爾舊職朕用人其惟吉士慎
畏巧言弗蠲於嗇夫爾肩好德欽承機命茲用德選匪
我求爾於辭

國子祭酒陸蘊太常少卿徐敷言起居舍人王

觀並除中書舍人制

朕託於兆衆之上所以鼓天下之動而見乎辭必假於能言者播四方以訓誥命誓之文使之趨向有重於勸賞服四裔以威令文告之辭使之震疊有重於討伐夫能感人於一言之間而革心於九州四海之遠豈不謂大哉王言乎爾國之雋良溢於辭藝其為朕明慎典刑具載誠意豈惟朝廷以文施於詔令能行之久遠惟爾儒者以文見於世用豈不榮哉

馬賁大司樂制

昔舜命夔典樂百獸率舞應於擊拊周官大司樂之職
致鬼神祇爰及象物嗚呼彼何以然哉朕正律度以諧
中聲祈協古始迺至大合於庭休嘉震動珍物時至七
政軌度風雨咸若朕方告成以薦上帝聲於清廟以揚
祖宗光烈庶幾追韶武之盛汝以好學博古有聞典職
惟舊肆命汝為長其為朕審音以詔治忽無俾細大有
踰汝亦休哉

馬咸除大理少卿制

古我先王慎罰惟匹夫底厥辜五刺三宥命公卿聽於槐棘既有辭於戮時乃徹樂用能象衣冠以無犯罔不祗畏朕哀矜庶獄疇寄枉直俾民不寃爾以明恕進助司寇嗚呼戒哉哲人惟刑無疆之休可

開封少尹陳知質除大理少卿制

古之君子其蔽有罪五聽而三刺既已情得矣又為求所以生朝夕伏念惟恐有不辜於戮或者已論涕泣而

哀憐之夫其恕心若此然後可以寄枉直而民無有所
侵冤朕矜慎用刑藐然嘉唐虞成周之治乃者廷尉留
獄待問寢以失職故詳求寬恕明察之士以副朕心得
汝於政事已試矣惟良折獄非朕所貴必也無訟乃從
予欲

曹調除光祿卿吏部郎中田登鴻臚少卿制

漢用九卿為近臣或典宿衛所以彌補朝廷之遺皆國
之良也朕復古官儀益難其選以爾調昔為廷尉善用禮

律登習於治郡能體德音並踐九列往修爾職夫名器之得以人為重能服朕言則有令問

太常少卿畢漸移鴻臚少卿制

勅具官某九卿之職雖輕重繁簡不同而選建卿貳皆以久歷事任者為之爾服在奉常閱日滋久司賓之雅蔽自朕心往其欽承無忘勵勉可

尚書庫部員外郎葉劭為鴻臚少卿制

九卿之亞職任為優惟時鴻臚掌予賓客疇咨俊乂咸

曰汝宜往惟欽哉毋替朕命

莊徽試太府卿制

古者九卿以為內朝臣預聞政事其爵列崇矣非我迪哲之士惇厚足以格物愷悌足以容衆克有常德其孰宜之爾久試於外還復舊列率勵在服惟老成人且國有君子民之望也其體朕意踐修爾職

開封府少尹李伯宗除衛尉卿制

惟六官允釐庶事分命九列秉德陪輔濟示休茲矧總

我屯衛作扞於王宮時余一人倚毗汝歷試惟舊顯有
風烈聿圖爾成序陟正卿今予祇命爾夙夜警戒往徇
於旅肅遏姦慝若古宿衛惟賢朕倚綏於爾總統衆士
欽哉

集賢殿修撰陳彥文除兵部侍郎制

三代之政兵必選於井牧將必選於鄉士於赫神考追
隆成周寓兵於農而用六鄉師田之法還政於中臺而
復六鄉司馬之任選建材德協成治功具官某議論通

明智識闕與召登黃門改貳政典乃眷貴任莫如已試爾其典治師旅設張紀律以稱神考復古之政以副予一人用舊之意

顯謨閣待制陳彥文除戶部侍郎制

太宰經制國用惟時司徒修厥官用贊太宰朕惟理財有政事立藝於民之中有能典朕邦計其試可哉具官某服勞有家奉事不懈若金發硎乂用不劙俾爾往貳政典協德於農父凡我六鄉之亞茲惟近臣民用視數

其爾導利於上下正辭初載無矜吝出納為爾功欽哉
霍端友吏部侍郎蔡靖禮部侍郎制

我先王授政於六事咸正執秩惟天官總治典詔馭賞
罰式序庶官有倫惟宗伯治神人肅恭齋明俾罔恫怨
於國敷求德位惟允式時艱哉具官某祗畏無咎迪有
嘉績歷年於茲序陟爾介卿惟篤厚風俗俾王室尊非
特爾卿士肆用詢謀師虞罔敢自擇爾尚既乃心稱予

一人茲舉

兵部侍郎潘允除吏部侍郎制

朕惟使人必信與天下共之宜莫如法然昔之掌選者以其意進退天下士而身任其責世以為嫌反賢於用法何哉朕敷求良士責成此意具官某邦之司直古之遺愛事朕諫列知無不言為國督姦義形於色擇於久次升貳冢宰推汝愛人致於流品推爾督姦審於馭吏庶幾銓綜人物而士無失職

吏部侍郎姚祐除工部尚書制

朕於用人必使久次於位而能實顯著德望在人衆皆
曰可然後舉而付之所以示位次有叙名器之難也具
官某昔踐諫列造膝有言周旋貳卿承命不懈朕既觀
汝於十年之久得汝於衆言之公進專所職使任事典
詩曰行歸於周萬民所望夫視其容聽其言民之望也
豈非克有常德而民觀聽服從之久乎

工部尚書鄭允中除禮部尚書制

古者宗伯之職擇聰明齊肅之士能知鬼神氏族之出

用能順道其欲惡享於神人使無有恫怨夫民和而神
享底於嘉生則國無事矣具官某深於經術聞古人俎
豆之事達於上世知成周雅頌之樂往踐所學追繼前
哲朕方用德以典神天汝其秉禮以秩位序無斁汝守
以稱朕意

刑部尚書慕容彥逢工部侍郎宇文粹中中書
舍人張縯緣省試知舉舉人譏訕降官叙復制
朕陟降在廷進人以禮雖國之典刑不廢貴近顧體貌

之舊圖惟始終具官某直諒多聞顯有風烈忠以衛上
可用為儀坐累選舉亦已期矣雖用春秋責賢之法終
惟孔子觀過之義其寵新命還復舊物朕於馭臣不以
一眚廢德爾之事上必思補過為忠